

竹書紀年卷上



黃帝軒轅氏

母曰附寶見大電繞北斗樞星光照郊野感而孕二十五月而生帝於壽丘弱而能言龍顏有聖德効百神朝而使之應龍攻蚩尤戰虎豹熊羆四獸之力以女魃止淫雨天下既定聖德光被羣瑞畢臻有屈軼之草生於庭

明范欽訂



東京大學  
東洋文化研究所所藏  
漢籍善本全文影像資料庫

書名 竹書紀年二卷 嘉靖中四明范氏天一閣刊本  
撰者 梁 沈約 注, 明 范欽 訂  
卷 卷上  
內容分類 史-古史-竹書紀年  
索書號 史部-編年-1  
編號 B1452800

[彩色首頁1](#)

[東洋文化研究所漢籍目錄](#) 編號: B1452800

[東洋文化研究所漢籍目錄所藏漢籍善本全文影像資料庫](#) 索書號: 史部-編年-1

[漢籍善本全文影像資料庫](#) 文本 [竹書紀年二卷](#) 嘉靖中四明范氏天一閣刊本

版權所有: [東京大學](#) [東洋文化研究所](#)

[使用上的注意事項](#)

東方文化學院東京研究所  
No. 523



東洋  
圖書

竹書紀年卷上

梁沈約附註

明范欽訂

黃帝軒轅氏

母曰附寶見大電繞北斗樞星光照郊野感而孕二十五月而生帝於壽丘弱而能言龍顏有聖德効百神朝而使之應龍攻蚩尤戰虎豹熊羆四獸之力以女魃止淫雨天下既定聖德光被羣瑞畢臻有屈軼之草生於庭



佞人入朝則草指之是以佞人不敢進

元年帝卽位居有熊○初制冕服

二十年景雲見以雲紀官

有景雲之瑞赤方氣與青方氣相連赤方中有兩星青方中有一星凡三星皆黃色以天清明時見於攝提名曰景星帝黃服齋于中宮坐于玄扈洛水之上有鳳凰集不食生蟲不履生草或止帝之東園或巢於阿閣或鳴於庭其雄自歌其雌自舞麒麟在囿神鳥來儀有大螻如羊大蠖如虹帝以土氣勝遂以土德王

五十年秋七月庚申鳳鳥至帝祭于洛水

庚申天霧三日三夜晝昏帝問天老力牧容成曰於公何如天老曰臣聞之國安其主好文則鳳凰居之國亂其主好武則鳳凰去之今鳳凰翔於東郊而樂之其鳴音中夷則與天相副以是觀之天有嚴教以勸帝帝勿犯也召史卜之龜焦史曰臣不能占也其問之

聖人帝曰已問天老力牧容成矣史北面再拜曰龜不違聖智故焦霧既降游于洛水之上見大魚殺五牲以醮之天乃甚雨七日七夜魚流於海得圖書焉龍圖出河龜書出洛赤文篆字以授軒轅接萬神於明庭今塞門谷口是也

五十九年貫胷氏來賓○長股氏來賓

七十七年昌意降居若水產帝乾荒

一百年地裂○帝陟

帝王之崩皆曰陟書稱新陟王謂新崩也帝以土德王應地裂而陟葬羣臣有左徹者感思帝德取衣冠几杖而廟饗之諸侯大夫歲時朝焉

帝摯少昊氏

約按帝摯少昊氏母曰女節見星如虹下流華渚既而夢接意感生少昊登帝位有鳳凰之瑞或曰名清不居帝位帥鳥師居西方以鳥紀官

帝顓頊高陽氏

母曰女樞見瑤光之星貫月如虹感已於幽  
房之宮生顓頊於若水首戴干戈有聖德生  
十年而佐少昊氏二十而登帝位

元年帝卽位居濮

十三年初作曆象

二十一年作承雲之樂

三十年帝產伯鯨居天穆之陽

七十八年帝陟○術器作亂辛侯滅之

帝嚳高辛氏

生而駢齒有聖德初封辛侯代高陽氏王天  
下使鼓人拊鞀鼓擊鐘磬鳳凰鼓翼而舞

元年帝卽位居亳

十六年帝使重帥師滅有鄗

四十五年帝錫唐侯命

六十三年帝陟

帝子摯立九年而廢

帝堯陶唐氏

母曰慶都生於斗維之野常有黃雲覆其上



及長觀于三河常有龍隨之一日龍負圖而  
至其文要曰亦受天祐眉八彩鬚髮長七尺  
二寸面銳上豐下足履翼宿既而陰風四合  
赤龍感之孕十四月而生堯於丹陵其狀如  
圖及長身長十尺有聖德封於唐夢攀天而  
上高辛氏衰天下歸之

元年丙子帝卽位居冀○命羲和曆象

五年初巡狩四岳

七年有麟

十二年初治兵

十六年渠搜氏來賓

十九年命共工治河

二十九年春雒僂氏來朝貢沒羽

四十二年景星見于翼

五十年帝遊于首山乘素車玄駒

五十三年帝祭于洛

五十八年帝使后稷放帝子朱于丹水

六十一年命崇伯鯀治河

六十九年黜崇伯鯀

七十年春正月帝使四岳錫虞舜命

帝在位七十年景星出翼鳳凰在庭朱草生  
嘉禾秀甘露潤醴泉出日月如合璧五星如  
連珠厨中自生肉其薄如箠搖動則風生食  
物寒而不臭名曰箠脯又有草莢階而生月  
朔始生一莢月半而生十五莢十六日以後  
日落一莢及晦而盡月小則一莢焦而不落  
名曰蓂莢一日曆莢洪水既平歸功於舜將

以天下禪之乃潔齊脩壇場於河洛擇良日  
率舜等升首山遵河渚有五老游焉蓋五星  
之精也相謂曰河圖將來告帝以期知我者  
重瞳黃姚五老因飛爲流星上入鼎二月辛  
丑昧明禮備至於日昃榮光出河休氣四塞  
白雲起回風搖乃有龍馬銜甲赤文綠色緣  
壇而上吐甲圖而去甲似龜背廣九尺其圖  
以白玉爲檢赤土爲泥似黃金約以青繩  
檢文曰闔色授帝舜言虞夏當授天命帝乃

寫其言藏於東序後二年二月仲辛率羣臣  
沈璧于洛禮畢退俟至于下曷赤光起玄龜  
負書而出背甲赤文成字止壇其書言當禪  
舜遂讓舜

七十一年帝命二女嬪于舜

七十三年春正月舜受終于文祖

七十四年虞舜初巡狩四岳

七十五年司空禹治河

七十六年司空伐曹魏之戎克之

八十六年司空入觀贊用玄圭

八十七年初建十有二州

八十九年作游宮于陶

九十年帝游居于陶

九十七年司空巡十有二州

一百年帝陟于陶

帝子丹朱避舜于房陵舜讓不克朱遂封于

房爲虞賓三年舜卽天子之位

帝舜有虞氏

母曰握登見大虹意感而生舜於姚墟目重瞳子故名重華龍顏大口黑色身長六尺一寸舜父母憎舜使其塗廩自下焚之舜服鳥工衣服飛去又使浚井自上填之以石舜服龍工衣自傍而出耕於歷夢眉長與髮等遂登庸

元年己未帝卽位居冀○作大韶之樂

卽帝位冀莢生於階鳳凰巢於庭擊石拊石以歌九韶百獸率舞景星出于房地出乘黃之馬

三年命咎陶作刑

九年西王母來朝

西王母之來朝獻白環玉珎

十四年卿雲見命禹代虞事

在位十有四年奏鐘石笙管未罷而天大雷雨疾風登屋拔木桴鼓播地鐘亂行舞人頓伏樂正狂走舜乃磬堵持衡而笑曰明哉天下非一人之天下也亦乃見于鐘石笙筦

乎。乃薦禹於天。使行天子事也。于時和氣普應。慶雲興焉。若烟非烟。若雲非雲。郁郁紛紛。蕭索輪囷。百工相和而歌。卿雲帝乃倡之曰。慶雲爛兮。禮縵縵兮。日月光華。旦復旦兮。羣臣咸進頓首曰。明明上天。爛然星陳。日月光華。弘于一人。帝乃再歌曰。日月有常。星辰有行。四時從經。萬姓允誠。於予論樂。配天之靈。遷于聖賢。莫不咸聽。饗乎鼓之。軒乎舞之。精華以竭。褰裳去之。於是八風循通。慶雲叢聚。

蟠龍奮迅於其藏。蛟魚踊躍於其淵。龜鼈以出其穴。遷虞而事夏。舜乃設壇於河。依堯故事。至于下。晷榮光休至。黃龍負圖。長三十二尺。廣九尺。出于壇畔。赤文綠錯。其文言當禪禹。

十五年帝命夏后有事于太室  
 十七年春二月入學初用萬  
 二十五年息慎氏來朝貢弓矢  
 二十九年帝命子義鈞封于商

三十年葬后育于渭

三十二年帝命夏后總師遂陟方岳

三十三年春正月夏后受命于神宗遂復九州

三十五年帝命夏后征有苗有苗氏來朝

四十二年玄都氏來朝貢寶玉

四十七年冬隕霜不殺草木

四十九年帝居于鳴條

五十年帝陟

義鈞封于商是謂商均后育娥皇也鳴條有

蒼梧之山帝崩遂葬焉今海州

帝禹夏后氏

母曰脩已出行見流星貫昴夢接意感既而吞  
神珠脩已背剖而生禹於石紐虎鼻大口兩耳  
參鏤首戴鈎鈴胷有玉斗足文履已故名文  
命長有聖德長九尺九寸夢自洗於河取水  
飲之又有白狐九尾之瑞當堯之世舜舉之  
禹觀於河有長人白面魚身出曰吾河精也  
呼禹曰文命治水言訖授禹河圖言治水之

事乃退入于淵。禹治水既畢，天錫玄珪以告成功。夏道將興，草木暢茂，青龍止於郊，祝融之神降于崇山，乃受舜禪，即天子之位。洛出龜書，是爲洪範。三年喪畢，都于陽城。

元年壬子，帝卽位居冀。○頒夏時于邦國。

二年咎陶薨。

五年巡狩會諸侯于塗山。

南巡狩濟江中流，有二黃龍負舟，舟人皆懼。禹笑曰：吾受命於天，屈力以養人，生性也。死

命也。奚憂龍哉！龍於是曳尾而逝。

八年春，會諸侯于會稽，殺防风氏。○夏六月，雨金于夏邑。○秋八月，帝陟于會稽，禹立四十

五年。

禹薦益於天。七年，禹崩。三年喪畢，天下歸啓。

帝啓。

元年癸亥，帝卽位于夏邑。大饗諸侯于鈞臺。諸侯從。

帝歸于冀都，大饗諸侯于璿臺。

二年費侯伯益出就國○王帥師伐有扈大戰

于甘有扈在始平鄠縣

六年伯益薨祠之

八年帝使孟涂如巴涖訟

十年帝巡狩舞九韶于大穆之野

十一年放王季子武觀于西河武觀即五觀也觀國今頓丘衛縣

十五年武觀以西河叛彭伯壽帥師征西河武

觀來歸

十六年陟

帝太康

元年癸未帝卽位居斟鄩畋于洛表羿入居斟

鄩

四年陟

帝仲康

元年己丑帝卽位居斟鄩

五年秋九月庚戌朔日有食之命胤侯帥師征

羲和

三



六年錫昆吾命作伯

七年陟○世子相出居商丘依邳侯

一作依同姓諸侯

灌斟

帝相

元年戊戌帝卽位居商○征淮夷

二年征風及黃夷

七年于夷來賓

八年寒浞殺羿使其子澆居過

九年相居于斟灌

十五年商侯相土作乘馬遂遷于商丘

二十年寒浞滅戈

二十六年寒浞使其子澆帥師滅斟灌

二十七年澆伐斟鄩大戰于維覆其舟滅之

二十八年寒浞使其子澆弑帝后緡歸于有仍

伯靡出奔鬲

斟灌之墟是爲帝丘后緡方娠逃出自竇歸

于有仍伯靡奔有鬲氏

夏世子少康生

丙寅年

少康自有仍奔虞乙酉年

伯靡自鬲帥斟鄩斟灌之師以伐浞世子少康

使汝艾伐過殺澆甲辰年 ○伯子杼帥師滅戈

伯靡殺寒浞少康自綸歸于夏邑乙巳年

明年后緡生少康既長為仍牧正甚澆能戒

之澆使椒求之將至仍少康逃奔有虞為之

庖正以除其害虞思於是妻之以二姚而邑

諸綸有田一成有眾一旅能布其德而兆其

謀以收夏眾撫其官職夏之遺臣伯靡自有

鬲氏收二斟之燼以伐浞浞恃澆皆康娛日

忘其惡而不為備少康使汝艾謀澆初浞娶

純狐氏有子早死其婦曰女岐寡居澆強圉

往至其戶陽有所求女岐為之縫裳共舍而

宿汝艾夜使人襲斷其首乃女岐也澆既多

力又善害艾乃畋獵放犬逐獸因喉澆顛隕

乃斬澆以歸于少康於是夏眾滅浞奉少康

歸于夏邑諸侯始聞之立為天子祀夏配天

不失舊物

帝少康

元年丙午帝即位諸侯來朝賓虞公

二年方夷來賓

三年復田稷

后稷之後不窳失官至是而復

十一年使商侯冥治河

十八年遷于原

二十一年陟

帝杼

元年己巳帝即位居原

五年自原遷于老丘

八年征于東海及三壽得一狐九尾

十三年商侯冥死于河

十七年陟

杼或作帝宁一曰伯杼杼能帥禹者也故夏

后氏報焉

帝芬

元年戊子帝即位

三年九夷來御

十六年洛伯用與河伯馮夷鬪

三十三年封昆吾氏子于有蘇

三十六年作園土

四十四年陟

芬或曰芬發

帝芒

元帝壬申帝卽位以玄珪賓于河

十三年東狩于海獲大魚

三十三年商侯遷于殷

五十八年陟

芒或曰帝荒

帝泄

帝元年辛未帝卽位

十二年殷侯子亥賓于有易有易殺而放之

十六年殷侯微以河伯之師伐有易殺其君綿

臣

殷侯子亥賓于有易而淫焉有易之君綿臣

殺而放之故殷上甲微假師于河伯以伐有  
易滅之遂殺其君綿臣中葉衰而上甲微復  
興故殷人報焉

二十一年命畎夷白夷玄夷風夷 黃夷

二十五年陟

帝不降

元年巳亥帝卽位

六年伐九苑

三十五年殷滅皮氏

五十九年遜位于弟廆

帝廆

元年戊戌帝卽位

十年帝不降陟

三代之世內禪惟不降實有聖德

十八年陟

帝廕

一名胤甲

元年巳未帝卽位居西河

四年作西音○昆吾氏遷于許

巴姓名樊封于衛夏衰為伯遷

許于舊

八年天有祆孽十日竝出其年陟

帝孔甲

元年乙巳帝卽位居西河○廢豕韋氏使劉累

豢龍

三年王畋于荇山

五年作東音

七年劉累遷于魯陽

王好事鬼神肆行淫亂諸侯化之夏政始衰

田于東陽荇山天大風晦盲孔甲迷惑入于

民室主人方乳或曰后來見良日也之子必

大吉或又曰不勝也之子必有殃孔甲聞之

曰以為余一人子夫誰殃之乃取其子以歸

既長為斧所戕乃作破斧之歌是為東音劉

累所畜龍一雌死潛醢以食夏后夏后饗之

既而使求之懼而遷于魯陽其後為范氏

九年陟○殷侯復歸于商丘

帝昊

昊一作皐

元年庚辰帝卽位○使豕韋氏復國

夏衰昆吾豕韋相繼

伯為

三年陟

帝發

一名后敬或曰發惠

元年乙酉帝卽位○諸夷賓于王門冉保墉會

于上池○諸夷入舞

七年陟○泰山震

帝癸

一名桀

元年壬辰帝卽位居斟鄩

三年築傾宮○毀容臺○畎夷入于岐以叛

六年岐踵戎來賓

十年五星錯行夜中星隕如雨○地震○伊洛

竭

十一年會諸侯于仍有緡氏逃歸遂滅有緡

十三年遷于河南○初作輦

十四年扁帥師伐岷山一作山民

癸命扁伐山民山民女于桀二人曰琬曰琰

后愛二人女無子焉斲其名于茗華之玉茗

是琬華是琰而棄其元妃于洛曰妹喜於傾

宮飾瑤臺居之

十五年商侯履遷于亳成湯元年

十七年商使伊尹來朝

二十年伊尹歸于商及汝鳩汝方會于北門

二十一年商帥征有洛克之遂征荆荆降

二十二年商侯履來朝命囚履于夏臺

二十三年釋商侯履○諸侯遂賓于商

二十六年商滅溫

二十八年昆吾氏伐商商會諸侯于景亳遂征

韋商師取韋遂征顧○太史令終古出奔商

二十九年商師取顧○三日竝出○費伯昌出

奔商○冬十月鑿山穿陵以通于河

三十年瞿山崩○殺其大夫關龍逢○商師征



昆吾○冬聆隧災

三十一年商自陟征夏邑克昆吾大雷雨戰于鳴條夏師敗績桀出奔三朥商師征三朥戰于劇獲桀于焦門放之于南巢

自禹至桀十七世有王與無王用歲四百七

十一年起壬子終壬戌

殷商成湯

名履

湯有七名而九征放桀于南巢而還諸侯八

譯而來者千八百國奇肱氏以車至乃

天乙履為天子三讓遂即天子之位初高辛

氏之世妃曰簡狄以春分玄鳥至之日從帝

祀郊禘與其妹浴於玄丘之水有玄鳥銜卵

而墜之五色甚好二人競取覆以二筐簡狄

先得而吞之遂孕胷剖而生契長為堯司徒

成功於民受封於商後十三世生主癸主癸

之妃曰扶都見白氣貫月意感以乙日生湯

號天乙豐下銳上哲而有顙句身而揚聲長

九尺臂有四肘是為成湯湯在亳能脩其德  
 伊摯將應湯命夢乘船過日月之傍湯乃東  
 至于洛觀帝堯之壇沈璧退立黃魚雙踴黑  
 鳥隨之止于壇化為黑玉又有黑龜竝赤文  
 成字言夏桀無道湯當代之檣杵之神見于  
 邳山有神牽白狼銜鉤而入商朝金德將盛  
 銀自山溢湯將奉天命放桀夢及天而舐之  
 遂有天下商人後改天下之號曰殷

十八年癸亥王即位居亳○始屋夏社

十九年大旱○氏羌來賓

二十年大旱○夏桀卒于亭山禁弦歌舞

二十一年大旱○鑄金幣

二十二年大旱

二十三年大旱

二十四年大旱王禱于桑林雨

二十五年作大濩樂○初巡狩定獻令

二十七年遷九鼎于商邑

二十九年陟

外丙

名勝

元年乙亥卽位居亳命卿士伊尹

二年陟

仲壬

名庸

元年丁丑王卽位居亳命卿士伊尹

四年陟

太甲

名至

元年辛巳王卽位居亳命卿士伊尹伊尹放太

甲于桐乃自立

約按伊尹自立蓋誤以攝政爲真爾

七年王潜出自桐殺伊尹天大霧三日乃立其

子伊陟伊奮命復其父之田宅而中分之

約按此文與前後不類蓋後世所益

十年大饗于太廟○初祀方明

十二年陟

沃丁

名絢

元年癸巳王卽位居亳命卿士咎單

八年祠保衡

十九年陟

小庚約按史記作太庚

名辨

元年壬子王卽位居亳

五年陟

小甲

名高

元年丁巳王卽位居亳

十七年陟

雍巳

名侁

元年甲戌王卽位居亳

十二年陟

太戊

名密

元年丙戌王卽位居亳命卿士伊陟臣扈  
七年有桑穀生于朝

十一年命巫咸禱于山川

二十六年西戎來賓王使王孟聘西戎

三十一年命費侯中衍爲車正

三十五年作寅車

四十六年大有年

五十八年城蒲姑

六十一年東九夷來賓

七十五年陟

大戊遇祥桑側身脩行三年之後遠方慕明

德重譯而至者七十六國商道復興廟爲中

宗竹書作  
太宗

仲丁

名莊

元年辛丑王卽位自亳遷于囂于河上

六年征藍夷

九年陟

外壬

名發

元年庚戌王卽位居囂○邳人妫人叛

十年陟

河澶甲

名整

元年庚申王卽位自囂遷于相

三年彭伯克邳

四年征藍夷

五年佻人入于班方彭伯韋伯伐班方佻人來

賓

九年陟

祖乙

名勝

元年巳巳王卽位自相遷于耿命彭伯韋伯

二年圮于耿自耿遷于庇

三年命卿士巫賢

八年城庇

十五年命邠侯高圉

十九年陟

祖乙之世商道復興廟為中宗史記與無逸皆無之

祖辛

名旦

元年戊子王即位居庇

十四年陟

開甲史記作沃甲

名踰

元年壬寅王即位居庇

五年陟

祖丁

名新

元年丁未王即位居庇

九年陟

南庚

名更

書經卷二十一

元年丙辰王卽位居庇

三年遷于奄

六年陟

陽甲一名和甲

名和

元年壬戌王卽位居奄

三年西征丹山戎

四年陟

盤庚

名旬

元年丙寅王卽位居奄

七年應侯來朝

十四年自奄遷于北蒙曰殷

十五年營殷邑

十九年命邠侯亞圉

二十八年陟

小辛

名頌



元年甲午王卽位居殷

三年陟

小乙

名斂

元年丁酉王卽位居殷

六年命世子武丁居于河學于甘盤

十年陟

武丁

名昭

元年丁未王卽位居殷命卿士甘盤

三年夢求傳說得之

六年命卿士傳說視學養老

十二年報祀上甲微

二十五年王子孝已卒于野

二十九年彤祭太廟有雉來

三十二年伐鬼方次于荆

三十四年王師克鬼方氏羗來賓

四十三年王師滅大彭

五十年征豕韋克之

五十九年陟

王殷之大仁也力行王道不敢荒寧嘉靖殷邦至于大小無時或怨是時輿地東不過江黃西不過氏羗南不過荆蠻北不過朔方而頌聲作禮廢而復起廟號高宗

祖庚

名曜

元年丙午卽位居殷作高宗之訓

一年陟

祖甲 國語作帝甲

名載

元年丁巳王卽位居殷

十二年征西戎○冬王返自西戎 祖甲西征得一丹山

十三年西戎來賓命邠侯組紆

二十四年重作湯刑

二十七年命王子囂王子良

三十三年陟

王舊在野及卽位知小人之依能保惠庶民  
不侮鰥寡迨其末也繁刑以攜遠殷道復衰

國語曰玄王勤商十有四世帝甲亂之七世而隕

馮辛 史記作廩辛

名先

元年庚寅王卽位居殷

四年陟

庚丁

名囂

元年甲午王卽位居殷

八年陟

武乙

名瞿

元年壬寅王卽位居殷邠遷于岐周

三年自殷遷于河北○命周公亶父賜以岐邑

十五年自河北遷于沫

二十一年周公亶父薨

二十四年周師伐程戰于畢克之

三十年周師伐義渠乃獲其君以歸

三十四年周公季歷來朝王賜地三十里玉十

穀馬十匹

三十五年周公季歷伐西落鬼戎○王畋于河

渭大雷震死

文丁史記作太丁非

名托

元年丁丑王卽位居殷自沫歸

二年周公季歷伐燕京之戎敗績

三年洹水一日三絕

四年周公季歷伐余無之戎克之命為牧師

五年周作程邑

七年周公季歷伐始呼之戎克之

十一年周公季歷伐翳徒之戎獲其三大夫來

獻捷王殺季歷

王嘉季歷之功錫之圭瓚秬鬯九命為伯既

而執諸塞庫季歷困而死因謂文丁殺季歷

執王季於塞庫羈文王於玉門  
鬱尼之情辭以作歌其傳久矣

十二年周文公元年有鳳集於岐山

十三年陟

帝乙

名羨

元年庚寅王卽位居殷

三年王命南仲西拒昆夷城朔方○夏六月周

地震

九年陟

帝辛

名受卽紂也一曰受辛

元年己亥王卽位居殷命九侯周侯邗侯周侯爲西

昌伯

三年有雀生鷁

四年大蒐于黎○作炮烙之刑

五年夏築南單之臺○雨土于亳

六年西伯初禴于畢

九年王師伐有蘇獲妲己以歸○作瓊室立玉

門

十年夏六月王畋于西郊

十七年西伯伐翟○冬王遊於淇

二十一年春正月諸侯朝周○伯夷叔齊自孤竹歸于周

二十二年冬大蒐于渭

二十三年囚西伯于羑里

二十九年釋西伯諸侯逆西伯歸于程

三十年春三月西伯率諸侯入貢

三十一年西伯治兵于畢得呂尚以爲師

三十二年五星聚于房○有赤鳥集于周社○  
密人侵阮西伯帥師伐密

三十三年密人降于周師遂遷于程○王錫命  
西伯得專征伐

約按文王受命九年大統未集蓋得專征伐  
受命自此年始

三十四年周師取耆及邠遂伐崇崇人降○冬  
十二月昆夷侵周

三十五年周大饑西伯自程遷于豐

三十六年春正月諸侯朝于周遂伐昆夷○西伯使世子發營鎬

三十七年周作辟雍

三十九年大夫辛甲出奔周

四十年周作靈臺○王使膠鬲求玉于周

四十一年春三月西伯昌薨周文王葬畢畢西於豐三十里

四十二年周武王元年西伯發受丹書于呂尚○有

女子化為丈夫

四十三年春大閼○嶢山崩

四十四年西伯發伐黎

四十七年內史向摯出奔周

四十八年夷羊見○二日竝出

五十一年冬十一月戊子周師渡盟津而還○

王囚箕子殺王子比干微子出奔

五十二年庚寅周始伐殷○秋周師次于鮮原

○冬十有二月周師有事于上帝庸蜀羗髡微

盧彭濮從周師伐殷伐殷至邢丘更名邢丘曰懷

湯滅夏以至於受二十九王用歲四百九十

六年 起癸亥 終戊寅

竹書紀年卷上







